

**Siunissami aammik akuluiartittartut sapinngisamik amerlanersaat Nunanitsinni isumagineqartarnissaat pillugu qanoq iliuusissamik pilersaarummik Naalakkersuisut suliareqquneqarnissaat pillugu Inatsisartut aalajangigassaattut siunnersuut. Qanoq iliuusissamik pilersaarut Inatsisartunut kingusinnerpaamik UPA 2015-imi saqqummiunneqartariaqarpoq.**

(Inatsisartunut ilaasortaq / Medlem af Inatsisartut Mimi Karlsen, Inuit Ataqtigiit).”

### **Akissut oqaaseqaataasoq**

(Peqqissutsimut Attaveqarnermullu Naalakkersuisoq)

### **Siullermeenera**

Aammik akuluiartittarnerup nunatsinnit tiguneqarnissaa pillugu qanoq iliuusissamik suliaqarnissaq inatsisartunut ilaasortap siunnersuutigisaanut assorsuaq qujavunga.

Aammik akuluiartinneq tassaavoq tartut suliunnaaraangata iliuuseqarnikkut katsorsaaneq, tartut suliunnaarnerat ima ilungersunartigisarluni napparsimasup eqqagassat nalinginnaasumik tartutigut anisinneqartartut peersinnaajunnaartarlugit. Tartut suliunnaarnerat assigiinngitsorpassuarnik peqquteqarsinnaasarpoq aamma meeqqat inersimasut utoqqaallu eqqorneqarsinnaallutik. Inuit ilaannut tartut suliunnaarnerat tartutigut nappaateqavinnermik peqquteqartarpoq kisianni tartut suliunnaarnerat nappaatip allap nassataatut takussaasarpoq assersuutigalugu sukkornermi.

Tartut suliunnaarnerat nutaanik tartuliinikkuttaaq katsorsarneqarsinnaasarpoq napparsimasullu amerlasuut aamminnik akuluiartittartut nutaanik tartulernerqarnissaminut utaqqillutik. Nunatsinni katillugit inuit 5 nutaanik tartulernerqarsimapput. Ilaatigut najukkaminni nakkutigineqartarput aammalu Dronningip Ingridip Napparsimavissuani tartut nappaataannut nakorsamit immikkut ilisimasalimmit nakkutigineqartarlutik.

Aammik akuluiaasarnerit assigiinngitsut marluupput, nassap ameraasaagut akuluiaaneq (akuluiaaneq-P), taavalu aakkut akuluiaaneq (akuluiaaneq-H).

Akuluiaaneq-P ukiorpassuanngorput Nunatsinnit tiguneqarmalli. Katsorsaaneq taanna Rigshospitalimi suliaritinnikkut aallarnerneqartarpoq, sullulinnguaq nassat iluanut ikkunneqartarluni. Tamatuma kingunitsianngua napparsimasoq nammineq akuluiaaneq-P atorlugu imminut suliarisarnissaminut sungiusarneqalertarpoq. Sungiusarneqareernerup kingorna akuluiaaneq-P najugaqarfimmi ingerlanneqarsinnaalertarpoq, napparsimasup sumi najugaqarnera apeqqutaatinnagu. Napparsimasoq najukkamini imaluunniit peqqissaaveqarfimmi/nunap immikkoortuani napparsimavimmi qaninnerpaami misissorneqartarpoq aammalu Dronning Ingridip Napparsimavissuani tartut nappaataannut nakorsamit immikkut ilisimasalimmit misissorneqartarluni. Akuluiaaneq-P nammineq angerlarsimaffimmi ingerlanneqarsinnaanera pissutigalugu nunatsinnit tigonera tartuminnik suliunnaartoorsimasunut neqeroorut assut pitsanngoriaataasimavoq.

Napparsimasut ilaannut akuluiaaneq-P naammaginartumik katsorsaaneqarsinnaangilaq, taakkulu akuluiaaneq-H-mik katsorsarneqartariaqartarlutik. Akuluiaaneq-H ullumikkut Nunatsinni neqeroorutigineqarsinnaangilaq. Akuluiaaneq-H atorlugu aak toqqaannartumik akuluarneqartarpoq sullulinnguakkut taqqat ilaannut atajuartussatut ikkussakkut. Tamanna sapaatip akunneranut 3-riarluni pigajuttarpoq.

Tartuluttut 15-16 Nunatsinni akuluiaaneq-P atorlugu katsorsarneqarput napparsimasullu 3 Danmarkimi akuluiaaneq-H atorlugu katsorsarneqarlutik.

Akuluiaaneq-H nunatsinnit tiguneqassagalarpat Dronning Ingridip Napparsimavissuani aammik akuluiaasarfimmut tamanna pissagalarpoq. Akuluiaaneq-H-p nunatsinnit tiguneqarnissaanut makku pigereerneqartariaqassapput:

1. suliamik ilisimasallit akuluiaaneq-H-mik immikkut ilisimasallit (nakorsaq immikkut ilisimasalik/ peqqissaasut immikkut ilisimasallit) atajuartumik najuuttarnissaat,
2. illutigit atortutigullu avatangiisit pigineqarnerat,
3. sulisut katsorsaariaatsimi tassani immikkut ittumi sungiussisimasut sulisarnissaat attatiinnarumallugu napparsimasut naammattut tunngavigalugit,
4. sulisut aamma atortut atajuartumik nutarsarneqartarnissaat katsorsaaneqarsinnaangilaq / nunani tamalaani pitsaassuserititaannik malinaajuarnissaa qulakkeerniarlugu.

Bornholmimi akuluiaaneq-H-mik afdelingiliornissamut atatillugu naatsorsuinerit takutippaat napparsimasut ikinnerpaamik 8-usariaqartut suliatigit avatangiisit atajuarsinnaasut pilersissagaanni kiisalu aamma aningaasatigit sulisutigullu iluaqutiginninneq sapinngisamik pitsaaneqarsinnaangilaq qularnaassagaanni.

Nakorsamit immikkut ilisimasalimmit ima nalilerneqarpoq akuluiaaneq-H-p maannakkut nunatsinnit tiguneqarnissaa suliatigit illersorneqarsinnaangitsoq, napparsimasut 3-innaagallartillugit suliatigit pitsaassuserititaq attanneqarsinnaangitsoq.

Aammik akuluiaaneq-H-p nunatsinnit tiguneqarnissaa ukiorpassuarni politikerininnaanniit aamma peqqinnissaqarfimminngaanniit kissaatigineqarsimavoq. Peqqissutsimut Pitsaaliuinerimullu Aqutsisoqarfiup aammik akuluiaasarnermi ineriartorneq ataavartumik malittarivaa aamma nunatsinnit tiguneqarnissaa eqqarsaatigalugu piviusunngortissinnaanera pilersissusialu pillugit periarfissanik nutaanik takkuttoqartarnersooq aamma malittaralugu. Naalackersuisut isumaqarput suliaqarfik taanna qanoq iliuuseqarnissamik pilersaarummik pisariaqartitsinngitsoq suliaqarfik qanimut malittarineqareermat.

Tamakku tunngavigalugit Naalackersuisut innersuussutigaaq siunnersuut itigartinneqassasoq.